



官常典第七百三十卷

忠烈部名臣列傳二十五

金一 僕忽得 酬幹

尸水中俱年四十三太祖悼惜遣使弔賻加等六年正月幹魯伐實里古達於石里罕河追及於合撻刺山殺四人撫定餘衆詔幹魯求酬幹僕忽得尸以葬天眷中贈酬幹奉國上將軍僕忽得昭義之天輔五年九月酬幹僕忽得往鼉古河籍軍馬燭俛水部實里古達等七人殺酬幹僕忽得投其尸水中俱年四十三太祖悼惜遣使弔賻加等六年正月幹魯伐實里古達於石里罕河追及於合撻刺山殺四人撫定餘衆詔幹魯求酬幹僕忽得尸以葬天眷中贈酬幹奉國上將軍僕忽得昭義大將軍酬幹亦宗室子也年十五隸軍從太祖伐遼率濤溫路兵招撫三坦石里很跋苦三水鼉古城邑皆降之敗室韋五百於阿良葛城獲其民衆至是死焉

胡沙補 撒八

按金史忠義傳胡沙補宗顏部人年三十五從軍頗見任用太祖使僕刮刺往遼國請阿疎實觀其

形勢僕刮刺還言遼兵不知其數太祖疑之使胡沙補往還報曰遼方調兵尙未大集及見統軍使其孫被甲立於傍統軍曰人謂汝輩且反故爲備耳及行道中遇渤海軍渤海軍向胡沙補且笑且言曰聞女直欲爲亂汝輩是邪具以告太祖又曰今舉大事不可後時若俟河凍則遼兵盛集來攻矣乘其未集而蚤伐之可以得志太祖深然之及破寧江州戰於達魯古城皆有功賜以旗鼓并御器械高永昌請和胡沙補往招之取胡突古以歸高永昌詐降於斡魯斡魯使胡沙補撒八往報會尙禎降言永昌非真降者斡魯乃進兵永昌怒遂殺胡沙補撒八皆支解之胡沙補就執神色自若罵永昌曰汝叛君逆天今日殺我明日及汝矣罵不絕口至死年五十九天會中與撒八俱贈遙鎮節度使

特虎雅

按金史忠義傳特虎雅撻瀾水人軀幹雄偉敢戰鬪達魯古城之役活女陷敵特虎救出之攻照散城遼兵三千來拒特虎先登敗之攻盧葛營麻吉墮馬特虎獨殺遼兵數輩掖而出之賞賚逾渥自臨潢班師至遼河余睹來襲婁室已引去特虎獨殿馬憊乃步鬪婁室與數騎來救特虎止之曰我

以一死捍敵公勿來俱斃無益遂沒於陣皇統間贈明威將軍

雙虔

按河間府志雙申爲清池令世宗時自陳父虔天眷中知永安軍死節宜正班用陰以勸忠孝世宗從之

溫迪罕移室瀨

按金史本傳溫迪罕移室瀨速頻屯瀨歡春人徙上京忽論失懶兄朮輦國初有功授世襲謀克移室瀨性忠正強毅善騎射膂力過人皇統初襲其兄謀克積戰功爲洮州刺史謂人曰謀克兄職也兄子幹魯古今已長矣遂以謀克讓還兄子宗弼聞而嘉之曰能讓世襲可謂難矣除貴德州刺史改移典乂詳穩遷烏古里部族節度使改德昌軍正隆四年大徵兵南伐泰州猛安定遠阿補以所部叛還移室瀨以七謀克執定遠阿補勒其衆付大軍契丹反敗會寧六猛安於締母嶺屯於信韓二州之境移室瀨率數千人殺賊萬餘於伊改河以功遷臨潢尹世宗卽位賜手詔曰南征諸路將士及卿子姪安遠幹魯古斜普兄弟具甲仗悉來推戴朕勉卽大位卿累世有功耆舊之臣緣邊事

未寧臨潢劇任姑仍舊職聞樞密副使白彥敬南京留守紇石烈志寧來討契丹今已遣人往招之其家皆在南京恐或遞去兼起異謀若至則已若不至卿當以計執而獻之兩次遣人招誘招討都監老和尚去人不知彼之所在久而不還兼老和尚不知朕已卽位卿可使人諭以朕意如來降悉令復舊邊關之事可設耳目是時窩斡已反領兵數萬來攻臨潢諸路軍未至窩斡勢益大移室濊領城中軍士六百人邀擊窩斡凡數接戰勦殺甚衆所乘馬中流矢而仆爲賊所執賊使移室濊招城中人曰爾生死在頃刻能使城中出降官爵如故不然殺汝矣移室濊怒罵賊曰我受國家爵祿肯從汝叛賊乎賊執之至城下迫脅之使招城中其妻子官屬將士皆登城臨望移室濊厲聲曰我恨軍少不能滅賊人生曾有一死耳汝輩慎勿降賊一旦開門納賊城中百姓皆被殺掠毋以我故敗國家事賊無能爲也賊怒殺之城中皆爲之感激推官麻珪益繕完城郭右監軍神土濊輔國上將軍阿思濊乘城固守賊不克攻遂引衆東行

訛里也 閏孫 史大 頗荅

按金史忠義傳訛里也契丹人爲尙廳局直長大定初招諭契丹窩斡叱令訛里也跪見訛里也不

從謂曰我朝廷使也豈可屈節於汝汝等早降可保全性命若大軍至汝輩悔將何及窩斡怒曰汝本契丹人而不我從敢出是言遂害之從行驍騎軍士聞孫史大習馬小底頗荅皆被害三年贈訛里也宣武將軍錄其子阿不沙爲外帳小底聞孫史大皆贈修武校尉頗荅贈忠翊校尉

納蘭綽赤

按金史忠義傳綽赤咸平路伊改河猛安人契丹括里使人招之綽赤不從括里兵且至綽赤遂團結旁近村寨爲兵出家馬百餘匹給之教以戰陣擊刺之法相與拒括里於改渡口由是賊衆月餘不得進旣而括里兵四萬人大至綽赤拒戰賊兵十倍遂見執縛而殺之詔贈官兩階二子皆得用廕

粘割韓奴

按金史忠義傳韓奴以護衛從宗弼征伐賜鎧甲弓矢戰馬初太祖入居庸關遼林牙耶律大石自古北口亡去以其衆來襲奉聖州壁於龍門東二十五里婁室往取之獲大石并降其衆宗望襲遼主輜重於青塚以大石爲鄉導詔曰遼趙王習泥烈林牙大石北王喝里質節度使訛里刺孛董赤

狗兒招討迪六詳穩六斤同知海里及諸官民並釋其罪復詔韓魯曰林牙大石雖非降附其爲鄉導有勞可明諭之時天輔六年也旣而亡去不知所往天會二年遼詳穩撻不野來降言大石稱王於北方署置南北面官僚有戰馬萬匹畜產甚衆詔曰追襲遼主必酌事宜而行攻討大石須俟報下三年都統完顏希尹言聞夏人與耶律大石約曰大金旣獲遼主諸軍皆將歸矣宜合兵以取山西諸部詔答曰夏人或與大石合謀爲釁不可不察其嚴備之七年泰州路都統婆盧火奏大石已得北部二營恐後難制且近羣牧宜列屯戍詔答曰以二營之故發兵諸部必擾當謹斥候而已八年遣耶律余睹石家奴拔离速追討大石徵兵諸部諸部不從石家奴至兀納水而還余睹報元帥府曰聞耶律大石在和州之域恐與夏人合當遣使索之夏國報曰小國與和州壤地不相接且不知大石所往也皇統四年回紇遣使入貢言大石與其國相鄰大石已死詔遣韓奴與其使俱往因觀其國風俗加武義將軍奉使大石韓奴去後不復聞問大定中回紇移習覽三人至西南招討司貿易自言本國回紇鄒括番部所居城名骨斯訛魯朶俗無兵器以田爲業所獲十分之一輸官耆老相傳失時契丹至不能拒因臣之契丹所居屯營乘馬行自旦至日中始周匝近歲契丹使其女

增阿本斯領兵五萬北攻葉不輦等部族不克而還至今相攻未已詔曰此人非隸朝廷番部不須發遣可於咸平府舊有回紇人中安置毋令失所是歲粘拔恩君長撒里雅寅特斯率康里部長孛古及戶三萬餘求內附乞納前大石所降牌印受朝廷牌印詔西南招討司遣人慰問且觀其意禿里余睹通事阿魯帶至其國見撒里雅具言願歸朝廷乞降牌印無他意也因曰往年大國嘗遣粘割韓奴自和州往使大石既入其境大石方適野與韓奴相遇問韓奴何人敢不下馬韓奴曰我上國使也奉天子之命來招汝降汝當下馬聽詔大石曰汝單使來欲事口舌邪使人摔下使韓奴跪韓奴罵曰反賊天子不忍於爾加兵遣招汝爾縱不能面縛請罪闕下亦當盡敬天子之使乃敢反加辱乎大石怒乃殺之此時大石林牙已死子孫相繼西方諸部仍以大石呼之余睹阿魯帶還奏并奏韓奴事世宗嘉韓奴忠節贈昭毅大將軍召其子永和縣商酒都監詳古汝州巡檢婁室諭之曰汝父奉使萬里不辱君命能盡死節朕甚閔之以詳古爲尙輦局直長遷武義將軍婁室爲武器署直長

曹珪

子弼

按金史忠義傳珪徐州人大定四年州人江志作亂珪子弼在賊黨中珪謀誅志并弼殺之尙書省議當補二官雜班叙詔曰珪赤心爲國大義滅親自古罕聞也法雖如是然未足以當其功更進一官正班用之

溫迪罕蒲睹 徒單賽里 赤盞胡失答 鶴壽 完顏朮里骨 完顏辭不失 赤盞胡失

賴 加古買住 完顏速沒葛 高彭祖

按金史忠義傳蒲睹爲兀者羣牧使西北路契丹撒八等反諸羣牧皆應之蒲睹聞亂作選家奴材勇者數十人給以兵仗陰爲之備賊不得發乃給諸奴曰官闔兵器願借兵仗以應闔諸奴以爲實然遂借與之明旦賊至蒲睹無以禦之賊執蒲睹而問之曰今欲反未蒲睹曰吾家世受國厚恩子姪皆仕宦不能從汝反而累吾族也賊怒斃而殺之子與孫皆與害是時迪幹羣牧使徒單賽里副使赤盞胡失答耶魯瓦羣牧使鶴壽歐里不羣牧完顏朮里骨副使完顏辭不失卜迪不部副使赤盞胡失賴速木典弘詳穩加古買住胡睹弘詳穩完顏速沒葛轄木弘詳穩高彭祖等皆遇害鶴壽鄆王昂子本名吾都不五院部人老和尚率衆來招鶴壽與俱反鶴壽曰吾宗室子受國厚恩盍殺

我不能與賊俱反遂與二子皆被殺

石抹元毅

按金史忠義傳元毅本名神思咸平府路酌赤烈猛安莎果歌仙謀克人也以廕補吏部令史再調景州寧津令有劇盜白晝恣劫爲民害元毅以術防捍賊散去入爲大理知法除同知亳州防禦使事使省檄錄陝右五路刑獄無冤人復委受宋歲幣故事有私遺物元毅一無所受明昌初驛召爲大名等路提刑判官以最遷汾陽軍節度副使時石嵐間賊黨嘯聚肆行剽掠朝廷命元毅捕之賊畏而遁元毅追襲盡殲之二境以安遷同知武勝軍節度使事別郡有殺人者屢鞠不伏元毅訊不數語卽具服河東北路田多山坡磽瘠大比時定爲上賦民力久困朝廷命相地更賦元毅以三壤法平之民賴其利改彰德府治中尋以邊警授撫州刺史會邊將失守芻糧馬牛焚剽殆盡元毅率更卒三十餘人出州經畫軍餉卒與敵遇州倅暨從吏堅請還元毅曰我輩責任邊守遇敵而奔其如百姓何縱得自安復何面目朝廷乎遂執弓矢令衆衆感其忠爭爲效死元毅力戰射無不中敵去而復合元毅氣愈厲鏖戰久之衆寡不敵遂遇害時年四十七事聞上深驚悼贈信武將軍召用

其子世勣侍儀司丞應世勣後登進士第奏名之日上謂宰臣曰此神思子邪歎賞者久之元毅性沈厚武勇過人每讀書見古人忠義事未嘗不嗟歎賞慕喜動顏色故臨難能死所事云

伯德梅和尚

按金史忠義傳梅和尚泰州人也性鯁直尚氣節正隆五年收充護衛授曷魯碗羣牧副使未幾復召爲護衛十人長改尚廐局副使遷本局使轉右衛將軍拱衛使典尚廐者十餘年積勞特遷官二階除復州刺史明昌初爲西北路副招討改秦州防禦使升武勝軍節度使六年移鎮崇義軍時有事北邊左丞相夾谷清臣行省於臨潢檄爲副統會敵入臨潢梅和尚暨護衛關合土等領軍逆擊之敵積陣以待梅和尚直擣其陣殺傷甚衆敵知孤軍無繼聚兵圍之度不能免乃下馬相背射復殺百餘人矢盡猶以弓提擊爲流矢所中死關合土等皆沒上聞之震悼詔贈龍虎衛上將軍躡遷十階特賜錢二十萬命以禮葬之物皆官給以其子都奴爲軍前猛安中奴護喪就差權同知臨潢府事李達可爲勅祭使同知德昌軍節度使事石抹和尚爲勅葬使承安五年上諭尚書省曰梅和尚死王事其子都奴從軍久有功其議所以酬之乃命爲典署丞

魏全 蒲烈古

按金史忠義傳全壽州人泰和六年宋季爽圍壽州刺史徒單義盡籍城中兵民及部曲廨役得三千餘人隨機拒守堅甚義善撫御得衆情雖婦人皆樂爲用同知蒲烈古中流矢卒義益勵不衰募人往斫爽營全在選中爲爽兵所執爽謂全曰若爲我罵金主免若死全至城下反罵宋主爽乃殺之至死罵不絕口僕散揆遣河南統軍判官乞住及買哥等以騎二千人救壽州去壽州十餘里與爽兵遇乞住分兩翼夾擊爽兵大破之斬首萬餘級追奔至城下拔其三柵焚其浮梁義出兵應之爽兵大潰赴淮死者甚衆爽與其副田林僅脫身去餘兵脫者十之四詔遷義防禦使乞住同知昌武軍節度使事買哥河南路統軍判官贈蒲烈古昭勇大將軍官其子圖刺贈全宣武將軍蒙城縣令封其妻爲鄉君賜在州官舍三間錢百萬俟其子年至十五歲收充八貫石正班局分承應用所贈官陰仍以全死節送史館鏤板頒諭天下

韓玉

按金史本傳玉字溫甫其先相人曾祖錫仕金以濟南尹致仕玉明昌五年經義辭賦兩科進士入

翰林爲應奏應制一日百篇文不加點又作元勳傳稱旨章宗嘆曰勳臣何幸得此家作傳邪泰和
中建言開通州潞水漕渠船運至都陞兩階授同知陝西東路轉運使事大安三年都城受圍夏人
連陷邠涇陝西安撫司檄玉以鳳翔總管判官爲都統府募軍旬日得萬人與夏人戰敗之獲牛馬
千餘時夏兵五萬方圍平涼又戰於北源夏人疑大軍至是夜解去當路者忌其功驛奏玉與夏寇
有謀朝廷疑之使使者授玉河平軍節度副使且覘其軍先是華州李公直以都城隔絕謀舉兵入
援而玉恃其軍爲可用亦欲爲勤王之舉乃傳檄州郡云事推其本禍有所基始自賊臣貪容姦賂
繼緣二帥貪固威權又云裹糧坐費盡膏血於生民棄甲復來竭資儲於國計要權力而望形勢連
歲月而守妻孥又云人誰無死有臣子之當然事至於今忍君親之弗顧勿謂百年身後虛名一聽
史臣只如今日目前何顏以居人世公直一軍行有日矣將有違約國朝人不從者輒以軍法從
事京兆統軍便謂公直據華州反遣都統楊珪襲取之遂寘極刑公直曾爲書約玉玉不預知其書
乃爲安撫所得及使者覘玉軍且疑預公直之謀卽實其罪玉道出華州被囚死於郡學臨終書二
詩壁間士論冤之子不疑字居之以父死非罪誓不祿仕藏其父臨終時手書云此去冥路吾心浩

然剛直之氣必不下沈兒可無慮世亂時艱努力自護幽明雖異寧不見爾讀者惻然

徒單航

按金史忠義傳航一名張僧駙馬樞密使某之子也父號九駙馬衛王有事北邊改授都元帥仍權平章殊不允人望張僧時爲吏部侍郎力勸其父請辭帥職遂拜平章至寧元年胡沙虎弑逆降航爲安州刺史會北兵大至城下聲言都城已失守汝可速降航謂其民曰城守雖嚴萬一攻破汝輩無子遺矣我家兩世駙馬受國厚恩決不可降汝輩計將安出其民曰太守不屈我輩亦何忍降願以死守航乃盡出家財以犒軍民軍民皆盡力備禦又五日城危航度不可支謂其妻孥曰今事急矣惟有死爾乃先縊其妻孥謂其家人曰我死卽撤屋焚之遂自縊死城破人猶力戰曰太守旣死我輩不可獨降死者甚衆

鄴陽 完顏石古乃

按金史忠義傳鄴陽宗室子爲符寶祇候完顏石古乃爲護衛十人長至寧元年八月紇石烈執中作亂入自通元門是日變起倉猝中外不知所爲鄴陽石古乃往天王寺召大漢軍五百人赴難與

古今圖書集成
執中戰於東華門外執中揚言曰大漢軍反矣殺一人者賞銀一定執中兵衆大漢軍少二人不勝而死須臾執中兵殺五百人殆盡執中死詔削官爵詔曰宣武將軍護衛十人長完顏石古乃修武校尉符寶祇候鄯陽忠孝勇果沒於王事石古乃贈鎮國上將軍順州刺史鄯陽贈宣武將軍順天軍節度副使嘗從拒戰猛安賞錢五百貫謀克三百貫蒲輦散軍二百貫各遷兩階戰沒者贈賞付其家石古乃子尙幼以八貫石俸給之俟年十五以聞

夾谷守中

按金史忠義傳守中咸平人本名阿土古大定二十二年進士歷清池聞喜主簿補尙書省令史除刑部主事監察御史修起居注轉禮部員外郎大名治中歷嵩涿北京臨洮路按察副使以憂去官起復同知曷懶路兵馬都總管府事坐事謫韓州刺史尋復同知平涼府事大安二年爲秦州防禦使遷通遠軍節度使至寧末移彰德軍未行夏兵數萬入鞏州守中乘城備守兵少不能支城陷官吏盡降守中獨不屈夏人壯之且誘且脅守中益堅遂載而西至平涼要以招降府人守中佯許至城下卽大呼曰外兵矢盡且遁矣慎勿降夏人交刃殺之興定元年監察御史郭著接行秦中得其

事以開詔贈資善大夫東京留守仍收其子兀母爲筆硯承奉

烏古孫兀屯

按金史忠義傳兀屯上京路人大定末襲猛安明昌七年以本兵充萬戶備邊有功除歸德軍節度副使改盤安軍察廉遷同知速頻路節度使事以憂去官起復歸德府治中遷唐州刺史泰和六年四月宋皇甫斌步騎萬人侵唐州兀屯兵甚少遣泌陽尉白撒不巡檢蒲閑各以五十人乘城拒守兀屯見宋兵在城東北者可破令軍事判官散虎帶以精兵百人自西門出繞出東北宋兵營後掩擊之殺數千人宋兵大亂追夜乃遁去五月皇甫斌復以兵數萬來攻行省遣泌陽副巡檢納合軍勝救唐州兀屯出兵與軍勝合兵城東北設伏兵以待之乃分騎兵爲三一出一入以致宋兵宋兵陷於淖伏兵發中衝宋兵爲二遂大潰追奔至湖陽斬首萬餘級獲馬三百匹宋別將以兵三千來襲遇之竹林寺殪之納合軍勝手殺宋將取其金帶印章以獻詔遷兀屯同知河南府事軍勝遷梁縣令各進兩階兀屯賞銀三百五十兩重綵十端爲右副元帥完顏匡右翼都統匡取棗陽遣兀屯襲神馬坡宋兵五萬人夾水陣以强弩拒岸兀屯分兵奪其三橋自辰至午連拔十三柵遂取神

古今圖書集成
馬坡從攻襄至漢江元屯亂流徑度復進一階號平南虎威將軍宋人請和遷河南副統軍大安初遷昌武軍節度使副統軍如故遷西南路招討使元屯御下嚴酷軍士多亡杖六十除同知上京留守事大安三年將兵二萬入衛中都遷元帥右都監轉左都監兼北京留守有功賜金吐鶻重綵十端遷元帥左監軍留守如故貞祐元年閏月以兵入衛中都詔以兵萬六千人守定興軍敗元屯戰沒

高守約

按金史忠義傳守約字從簡遼陽人大定二十八年進士累官觀州刺史大元兵徇地河朔郭邦獻已歸順從至城下呼守約曰從簡當計全家室守約弗顧至再三守約厲聲曰吾不汝識也城破被執使之跪守約不屈遂死詔贈崇義軍節度使諡忠敬

和速嘉安禮

按金史忠義傳安禮字子敬本名酌大名路人穎悟博學淹貫經史大定二十八年進士至寧末爲泰安州刺史貞祐初山東被兵郡縣望風而遁或勸安禮去之安禮曰我去城誰與守且避難負國